



NEYTENDASTOFA

Ákvörðun nr. 6/2007

**Kvörtun MúsíkNet ehf. yfir skráningu og notkun  
Vagnsson MultiMedia á léninu tónlist.is**

**I.**

**Málavextir og málsmeðferð**

Neytendastofu barst erindi, dags. 7. júní 2006, frá Agli Þorvarðarsyni hdl., f.h. MúsíkNets ehf., þar sem kvartað er yfir skráningu og notkun Vagnsson MultiMedia á léninu tónlist.is. Telur kvartandi að skráning og notkun Vagnsson MultiMedia á léninu tónlist.is brjóti í bága við 5. og 12. gr. laga nr. 57/2005 um eftirlit með óréttmætum viðskiptaháttum og gagnsæi markaðarins.

Í erindinu segir að kvartandi hafi skráð lénid tonlist.is í febrúar 2003, þá hafi ekki verið hægt að skrá lén með séríslenskum stöfum. Skömmu síðar hafi kvartandi hafið starfsemi sína á vefsíðunni. Starfsemin gangi út á að skrá og dreifa íslenskri tónlist á Netinu. Kvartandi sé með samninga við helstu útgefendur tónlistar hér á landi, listamenn og hagsmunaaðila tónlistargeirans um víða veröld. Markmið starfseminnar sé að tryggja rétt höfum og listamönnum tekjur af tónlist sem dreift sé á Netinu. Kvartandi sé einnig skráður fyrir léninu tonlist.com og þar starfræki hann svipaða þjónustu fyrir erlendan markað. Þá hafi kvartandi skráð vörumerki með orðmerkinu tónlist.is í vörumerkjaskrá Einkaleyfastofu í september 2005.

Fram kemur að eigandi lénsins tónlist.is sé Vagnsson MultiMedia, með skráð aðsetur í Þýskalandi. Skráður tengiliður sé Haukur Vagnsson. Notkun lénsins tónlist.is sé með þeim hætti að netnotandi sem slái veffangið tónlist.is inn í vafra sé umsvifalaust fluttur á vefsvæði kvartanda. Þrátt fyrir að lénid flytji notandann yfir á síðu kvartanda breytist veffangið ekki yfir í tonlist.is, heldur sé veffangið tónlist.is ritað í vafra notandans. Telur kvartandi þetta fyrirkomulag gefa notandanum þá villandi hugmynd að tónlist.is sé hið rétta veffang tonlist.is.

Kvartandi telur að notkun núverandi rétt hafa á léninu tónlist.is sé stunduð í því augnamiði að skapa rugling í hugum neytenda og gefa villandi upplýsingar um eignarétt að léninu tónlist.is. Skráning lénsins tonlist.is kom til af því að ekki var hægt að skrá séríslenska stafi í vefköngum þegar lénid var skráð. Í raun sé um sama lénanafn að ræða, með og án séríslenskra stafa. Kvartandi telur skráningu tónlist.is



hafa verið framkvæmda til þess að hindra kvartanda í að skrá lénið, valda ruglingi og trufla viðskiptavini tonlist.is.

Að lokum gerir kvartandi þær kröfur með vísan til 2. mgr. 16. gr. laga um óréttmæta viðskiptahætti að núverandi réttthafa lénsins verði bönnuð öll notkun þess og honum gert að afskrá lénið tónlist.is

## 2.

Erindi MúsíkNet var sent Hauki Vagnssyni, f.h. Vagnsson MultiMedia, til umsagnar með bréfi Neytendastofu, dags. 12. júní 2006, og óskað svara innan tíu daga. Ekkert svar barst stofnuninni innan tilskilins frests. Var þá annað bréf sent, dags. 28. ágúst 2006, og veittur lokafrestur til 7. september 2006.

Í óformlegu svari sem barst með tölvupósti, dags. 28. ágúst 2006, kvaðst Haukur Vagnsson, hafa átt lénið tonlist.is áður en MúsíkNet eignaðist lénið en misst það sökum þess að honum láðist að endurnýja það. Þegar lén með séríslenskum stöfum voru laus til umsóknar hafi hann sótt um lénið tónlist.is. Áður hafi lénið staðið MúsíkNet einum til boða í einhvern tíma en þeir ekki sinnt því og því eigi hann lénið með réttu í dag. Þá kveðst Haukur hafa leikið tónlist frá því hann var barn, verið í ýmsum hljómsveitum og verið viðloðandi tónlist mun lengur en MúsíkNet. Þá hafi hann dreift og selt tónlist áður en MúsíkNet var stofnað. Orðið tónlist sé algengt orð og MúsíkNet hafi enga sérstöðu umfram hann til að gera kröfu til lénsins. Að lokum segir í tölvupóstinum að formlegt svar við kvörtun MúsíkNet muni berast í september.

Þann 8. september 2006, hringdi Haukur Vagnsson og sagði að svar myndi berast stofnuninni í sama mánuði. Ekkert svar barst og ítrekaði þá Neytendastofa enn erindið með bréfi, dags. 17. nóvember 2006, og gaf lokafrest til 24. nóvember 2006. Ekkert svar barst og er málið því tekið til úrskurðar á grundvelli þeirra gagna sem fyrir liggja í málinu.

## II.

### Niðurstaða

Í erindinu kvartar MúsíkNet yfir notkun Vagnsson MultiMedia á léninu tónlist.is. MúsíkNet starfrækir lénið tonlist.is og hefur starfrækt það frá febrúar 2003. Starfsemin felst í því að dreifa og kynna tónlist á Netinu. Vagnsson MultiMedia skráði lénið tónlist.is í febrúar árið 2005, en heldur ekki úti neinni starfsemi á vefsíðunni heldur flytur netnotandann beint inn á vefinn tonlist.is hjá MúsíkNet.



Við skráningu léna hjá Isnic, sem sér um skráningu og úthlutun léna undir þjóðarléninu .is, gildir sú regla um úthlutun léna að „fyrstur kemur, fyrstur fær“. Fram til 1. júlí 2004 var ekki unnt að skrá lén með séríslenskum stöfum. Eftir 1. júlí og til loka árs 2004 höfðu eigendur léna án séríslenskra stafa forgang til skráningar samsvarandi léna með séríslenskum stöfum. Eftir 1. janúar 2005 var síðan öllum fjáls skráning slíkra léna og gildi þá reglan „fyrstur kemur, fyrstur fær“. Mjög takmörkuð not eru af lénum með séríslenskum stöfum þar sem fæstir vafrar bjóða enn sem komið er upp á notkun þeirra.

Að mati MúsíkNet er skráning Vagnsson MultiMedia á léninu tónlist.is brot á ákvæðum 5. og 12. gr. laga um óréttmæta viðskiptahætti.

Í 5. gr. laganna kemur fram að óheimilt sé að hafast nokkuð það að sem brjóti í bága við góða viðskiptahætti í atvinnustarfsemi eins og þeir eru tíðkaðir eða eitthvað það sem óhæfilegt sé gagnvart hagsmunum neytenda. Ákvæðið er almenn vísiregla að því er varðar viðskiptasiðferði og er ætlað að stuðla að góðum síðum í viðskiptum. Af ákvæðinu má ráða að í atvinnustarfsemi verði fyrirtæki að virða tiltekin siðferðileg gildi og viðhafa góða viðskiptahætti gagnvart keppinautum sínum og neytendum. Mat á því hvaða viðskiptahætti skuli viðurkenna og hverja ekki er lagt í hendur Neytendastofu og dómstóla. Ákvæði II. kafla laga um óréttmæta viðskiptahætti, svo sem 12. gr. gegna mikilvægu hlutverki sem viðmiðun og til leiðbeiningar við mat á því hvaða kröfur eigi lögum samkvæmt að gera til viðskiptahátta.

Í 12. gr. segir:

*„Óheimilt er að nota í atvinnustarfsemi firmanafn, verslunarmerki eða því um líkt, sem sá hefur ekki rétt til er notar, eða reka atvinnu undir nafni sem gefur villandi upplýsingar um eignarrétt eða ábyrgð atvinnurekanda. Enn fremur er sérhverjum bannað að nota auðkenni, sem hann á tilkall til, á þann hátt að leitt geti til þess að villst verði á því og öðru einkenni sem annað fyrirtæki notar með fullum rétt.i“*

Í 12. gr. felst almenn samkeppnisregla um vernd auðkenna og er hún til fyllingar á vörumerkjavernd eins og sést glögg af lögskýringargögnum, s.s. greinargerð með frumvarpi til samkeppnislaga. Fyrri málslíður greinarinnar hefur að geyma almennt bann við því að nota auðkenni, t.d. firmanafn og vörumerki, sem annar á. Rétturinn til þessara auðkenna getur hvílt á sérköngjöf svo sem lögum um vörumerki, lögum um verslunarskrár, firmu og prókúruumboð og því um líkt. Samkvæmt greinargerðinni skiptir ákvæðið máli um viðbótarvernd þá sem framangreind sérlæg veiti auðkennum. Þá segir í greinargerðinni að í 2. málslíð 12. gr. sé rétturinn til að nota eigin auðkenni



takmarkaður á þann veg að óheimilt sé að nota auðkenni þannig að leitt geti til þess að villst verði á því og öðru auðkenni sem annað fyrirtæki noti með fullum rétti.

Bæði fyrirtækin sem hér eigast við hafa skráð lén sín hjá Isnic sem sér um skráningu á lénnum með endingunni .is. MúsíkNet skráðu lénið tonlist.is í febrúar 2003 og Vagnsson MultiMedia í febrúar 2005. Að mati Neytendastofu eiga því báðir málsaðilar óumdeildan rétt til þessara auðkenna sinna í skilningi laga um óréttmæta viðskiptahætti. Kemur því seinni málsliður 12. gr. laga um óréttmæta viðskiptahætti til álita í máli þessu og skal því litið til þess hvort villast megi á auðkennunum.

Lénin tónlist.is og tonlist.is eru í raun eitt og sama lénnafnið, með og án íslenskra sérstafa. Orðið tónlist er almennt orð lýsandi fyrir þá vöru og þjónustu sem er í boði á vefnum tonlist.is. Vefurinn tónlist.is hefur einungis þá starfsemi að flytja notandann yfir á vefinn tonlist.is.

Í ljósi þess að MultiMedia heldur ekki úti neinni starfsemi á vefnum tónlist.is heldur flyst netnotandinn beint inn á síðu MúsíkNet, tonlist.is fær Neytendastofa ekki séð betur en skráning og notkun lénsins tónlist.is sé til þess fallin að valda ruglingi fyrir notendur tonlist.is og gefi villandi upplýsingar um hver sé réttur eigandi lénsins tónlist.is.

Með vísan til alls framangreinds telur Neytendastofa nauðsynlegt að banna Vagnsson MultiMedia að nota lénið tónlist.is og leggur fyrir fyrirtækið að láta afskrá það.

### III.

#### Ákvörðunarorð:

**„Vagnsson MultiMedia, Haukur Vagnsson, Aðalstræti 9, Bolungarvík, hefur með notkun lénsins tónlist.is brotið gegn 5. gr. og 2. ml. 12. gr. laga nr. 57/2005 um eftirlit með óréttmætum viðskiptaháttum og gagnsæi markaðarins.**

**Með vísan til 2. mgr. 16. gr. sömu laga bannar Neytendastofa Vagnsson MultiMedia, Hauki Vagnssyni alla notkun lénsins tónlist.is og leggur fyrir hann að afskrá lénið.**

**Bannið tekur gildi fjórum vikum eftir birtingu ákvörðunarinnar. Verði ekki farið að banninu mun viðurlögum laga nr. 57/2005 um eftirlit með óréttmætum viðskiptaháttum og gagnsæi markaðarins verða beitt.“**



Neytendastofa, 15. mars 2007